

寶雞縣志

卷九

卷十

卷十一

卷十二

寶雞縣志卷之九

人物

聖賢

上古炎帝神農氏姜姓母曰女登有蟠氏之女爲少典妃感神農而生炎帝長於姜水因以爲姓火德王故曰炎帝餘見三皇紀及通鑑前編

一統志鳳翔府寶雞縣南七里有姜氏城城南有姜水炎帝長於姜水卽此

周虢叔尙書惟文王尙克修和我有夏亦惟有若虢叔左傳虢仲虢叔王季之穆也爲文王卿士勳在王室藏於盟府

杜註虢仲虢叔王季之子文王之母弟也仲叔皆虢君字賈
逵云虢仲封東虢制是也虢叔封西虢虢公是也按賈逵似
以西虢爲上陽之虢不如晉太康記之核而有徵耳蓋虢叔
之虢卽後之虢縣也

虢文公國語宣王卽位不藉千畝虢文公諫王弗聽

韋註虢叔之後西虢也

西漢徐敖虢人爲右扶風掾受尙書於胡常少子受毛詩於解延

年以授九江陳俠由是言毛詩者本之徐敖

漢書儒
林傳

按邑儒林只敖一人然已兼通二經矣豈非所謂參勸講授

師賢法古者乎

忠義

金劉興哥號縣人爲楊沃衍部將會元兵破西夏長驅而至關輔千里皆洶洶不安雖智者亦無如何獨興哥與沃衍率兵往來邠隴間屢戰屢勝故元軍猝不東下後於清華戰死元兵至酹酒以弔西州耆老語之至爲泣下

愛申逸其族與名一名忙哥本號縣鎮防軍累功遷軍中總領李文秀據秦州宣宗詔鳳翔軍討之軍圍秦州城時愛申有罪當死宣宗問之樞帥有知其名者奏此人將帥材忠實可倚宣宗命馳赦之以爲德順節度使行元帥事正大四年春元兵西來擬以德順爲坐夏之所德順無軍人甚危之愛申識鳳翔馬

肩龍舜卿可與謀事乃遺書招之肩龍得書欲行鳳翔總管禾
速嘉國鑑以元兵方進吾城可恃德順決不可守勸勿往肩龍
曰愛申生平未嘗識我一見許爲知己我知德順不可守往則
必死然則知己固不得不爲之死耳乃舉行橐付族父明爲死
別冒險而去旣至不數日受圍城中惟有義兵鄉軍八九千人
元兵舉天下之勢攻之愛申假舜卿鳳翔總管府判官守禦一
與共之凡攻守二十晝夜力盡乃已同死於難臺諫有言當贈
德順死者官以勵中外詔各贈官配食褒忠廟

明楊畏知字介甫北菴堡人崇正中厯官雲南副使分巡金滄乙
酉秋武定土官吾必奎反陷祿豐廣通諸縣及楚雄府畏知督

兵赴楚雄駐其地必奎伏誅而阿迷土官沙定洲繼亂據雲南
黔國公沐天波走楚雄巡撫吳兆元不能制許爲奏請鎮雲南
定洲遂西追天波畏知說天波走永昌而已以楚雄當定洲定
洲至畏知復給之曰若所急者黔國耳今已西待爾定永昌還
朝命當已下予出城以禮見今順逆未分不能爲不義屈也定
洲恐矢天波與盟而去分兵陷大理蒙化畏知乘間清野繕牒
徵鄰境援兵姚安景東俱響應定洲聞不敢至永昌還攻楚雄
不能下畏知伺賊懈輒出擊殺傷多乃引去還攻石屏寧州嶠
峨皆陷之復西攻楚雄迄不能下明年孫可望等入雲南定州
還救大敗遁歸阿迷可望等遂據會城初唐王聞畏知抗賊進

授右僉都御史巡撫雲南以巡撫吳兆元爲總督及可望等至以畏知同鄉甚重之尋與劉文秀西略畏知拒戰敗投水不死距而罵可望下馬慰之曰聞公名久吾爲討賊來公能共事相與匡扶明室非有他也畏知瞪目視之曰給我爾可望曰不信當折矢誓畏知曰果爾當從我三事一不得仍用僞西年號二不得殺人三不得焚廬舍淫婦女可望皆許諾乃與至楚雄略定大理諸郡使文秀至永昌迎天波歸迤西八府免屠戮畏知力也時永明王已稱號于肇慶而詔令不至前御史臨安任僎議尊可望爲國主以干支紀年鑄興朝通寶錢畏知憤甚有所忤輒抵掌謾罵可望數欲殺之李定國劉文秀爲保護得免可

望興劉李同輩一旦自尊兩人不爲下聞肇慶有君李錦李成棟等並加封爵念得朝命加王封庶可相制乃議遣使奉表畏知亦素以尊主爲言歲己丑遣畏知及永昌故兵部郎中龔彝赴肇慶進可望表請王封爲金堡等所持畏知乃曰可望欲權出劉李上爾今晉之上公而卑劉李侯爵可也乃議封可望景國公賜名朝宗定國文秀皆列侯遣大理卿趙昱爲使加畏知爲兵部尙書彝兵部侍郎同行時堵允錫會賜空敕得便宜行事昱乃就與謀矯命改封可望平遼王易敕書以往武康伯胡執恭者慶國公陳邦傳中軍也守泗城州與雲南接欲自結可望言于邦傳先矯命封可望秦王曰藉其力可制李赤心也邦

傳乃鑄金章曰秦王之寶填所給空敕令執恭齎行可望大喜
郊迎亡何畏知等至可望駭不受曰我已封秦王矣畏知曰此
僞也執恭亦曰彼亦僞也所封實景國公敕印故在可望怒辭
敕使下畏知及執恭獄而遣使當梧州問故廷臣始知矯詔事
文安侯馬吉翔請封可望激江王使者言非秦不敢復命大學
士嚴起恆持不可兵部侍郎楊鼎和助之且請卻所獻白金玉
帶會鄭國公高必正等入朝召使者言本朝無異姓封王者例
我破京師逼死先帝滔天大罪蒙恩赦宥亦止公爵耳張氏竊
據一隅罪固減等封上公足矣安敢冀王爵自今當與我同心
報國洗去賊名毋欺朝廷孱弱我兩家士馬足相當也又致書

可望詞義嚴正使者唯唯退議遂寢必正者李白成妻弟同陷京師者也可望不得封益怒其年九月親率兵至貴州十一月大兵破廣州桂林王走南寧事急遣編修劉茵封可望冀王可望仍不受畏知曰秦冀等耳假何如真可望不聽定國等勸可望使畏知終其事可望許之明年二月先遣部將賀九儀張勝張明志赴南寧索沮秦封者起恆鼎和及給事中劉堯珍吳霖張載述殺之乃真封可望秦王而畏知旋至痛哭自劾語多侵可望遂留爲東閣大學士與吳貞毓同輔政可望聞之怒使人召至貴陽面責數之畏知大憤除頭上冠擊可望遂被殺贈太子太保文淵閣大學士諡文烈楚雄人立祠以祀

寶雞縣志
楊威字海聞由武舉任固原千總陞守備以親老乞假歸值流
寇犯境邑令嚴夢鸞邀共守城率鄉兵出剿多所斬獲一日搜
賊於縣西谷中遇伏知衆寡不敵麾鄉兵使退而自爲殿身被
數十創力戰而死

仕籍

唐楊炎字公南石鼻城人播之子也豪爽尙氣節河西節度使呂
崇賁辟掌書記李光弼表爲判官不應召拜起居舍人固辭父
喪廬墓側悲號不絕史稱有紫芝白雀之瑞詔表其廬三世以
孝行聞門樹六戟古所未有除司勳員外郎遷中書舍人與常
袞同時知制誥袞長除書而炎善德音開元後言制誥者稱楊

常云尋擢部部侍郎史館修撰會同慶元載敗坐貶道州司馬
德宗在東宮雅知其名又嘗得炎所爲李楷洛碑錄於壁諷玩
之及卽位拜門下侍郎同中書門下平章事炎當國其功之最
著者有租賦庸調均稅等法餘載唐書本傳卒年五十五諡肅
愍

宋閔詢字議道少以積學著名擢進士第遷秘書丞監察御史使
契丹詢頗諳北方疆理契丹不能欺尋爲進賢殿修撰知河中
府拜爲天章閣待制神宗轉右諫議大夫卒年七十九見宋史
本傳

元王檣字巨川鳳翔虢縣人父寔金武節將軍麟遊主簿檣性倜

儻弱冠舉進士不第乃入終南山讀書涉獵孫吳泰和中復下第詣闕上書論當世急務金主俾給事縉山元帥府尋用元帥高琪薦特賜進士授副統軍守涿鹿隘太祖將兵南下檄鏖戰三日兵敗見執將戮之神色不變太祖問曰汝何敢抗我師獨不懼死乎對曰臣以布衣受恩捐軀報國今旣償軍得死爲幸帝義而釋之授都統佩以金符令招集山西潰兵從大軍破紫荊關取涿易保州中山軍次雄州節度使孫吳堅守不下檄入城諭以禍福吳遂以城降甲戌授宣武使兼行尙書六部事從三合拔都大傅猛安率兵南征下古北口攻薊雲順等州所過迎降得漢軍數萬遂圍中都乙亥中都降檄進言曰國家以仁

義取天下不可失信於民宜禁擄掠以慰民望時城中絕粒人相食乃許軍士給糧入城轉糶故士得金帛而民獲粒食又議田野久荒而兵後無牛宜差官盧溝橋索軍回所驅牛十取其一以給農民用其說遂得數千頭分給近縣民大悅復業者衆三合猛安俾檄招諭保定新城信安雄霸文安清滄諸城皆望風款附乃置行司於滄州以鎮之遂從猛安入境授銀青榮祿大夫仍前職兼御史大夫世襲千戶時河間清滄復畔帝命檄討之復命駙馬孛禿分蒙古軍及紇漢軍三千屬檄遂復河間得軍民萬口孛禿惡其反復欲盡誅之檄解之曰驅羣羊使東西者牧人也羊何知哉殲其渠魁足以釋此輩遷之近縣強者

使從軍弱者使爲衆此天之所以畀我也何以殺爲李禿曰汝能保此輩不復反耶檄曰可卽移文保任之俱得全活帝命闍里畢與皇太弟國王分撥諸侯王城邑諭闍里畢曰漢人中若王宣撫者可任使之遂以前職兼判三司副使後又命省臣摠括歸附工匠之數將俾大臣分掌之大師阿海具列諸大臣名以聞帝曰朕有其人偶忘姓名耳良久曰得之矣舊人王宣撫可任是職遂命檄掌之時都城廟學旣燬於兵檄取舊樞密地復創立之春秋率諸生行釋菜禮仍取舊岐陽石鼓列廡下丙戌從征西夏及秦州夏人盡撤橋梁爲備軍阻不得前帝問諸將皆不知計所出檄夜督士卒運木石比曉橋成軍乃得進戊

子奉監國公主命領省中都屬盜起信安結北山盜李密轉掠近縣檄曰都城根本之地何可無備引水環城調度經費檄自爲券假之賈人而斂不及民人心稍安遣男守謙率軍討諸盜平之庚寅從征關中長驅入京兆進克鳳翔請於太宗曰此臣鄉邦願入城訪求親族果得族人數十口以歸王辰從攻汴梁癸巳奉命持國書使宋以兀魯剌副之至宋宋人甚禮重之卽遣使以金幣入貢檄前後凡五往以和議未決隱憂致疾卒於南宋人重贈之仍遣使歸其柩葬於燕子六人

明劉俊字世英號樸菴玉澗堡人以正統十年商輅榜第三人及第授編修十二年詔與江淵杜寧等十人肄業東閣曹鼎爲之

師俊才思捷敏常與商輅入對輅愧不能及及出與輅講論古今乃爲所難遂發奮讀書所學益邃拒石亨之請發汪直之奸一時有鐵板之號厯官修撰祭酒通政使太僕卿以工部侍郎致仕居鄉多善行壽七十卒

楊茂字林修玉澗堡人永樂辛卯舉人正統中厯湖廣道監察御史彈劾不避權貴考績允稱尋值南寇犯境出爲雲南廣南府知府到任先賑饑而後剿寇人樂爲死卒定其難孫祥由舉人任四川重慶府通判晉夔州府同知廉介有爲剛毅不阿人號青茱楊曾孫汝宮由舉人厯官江西臨江府同知御兵民有方分別土著新附有軍潛入民版者清還伍籍終楚府長史